

關  
中  
金  
石  
記

敘

余生平未嘗至關中聞有所謂碑林者未由見也數十年前有人從長安來叩之則大率在櫟莽中雨淋日炙不加葺治甚且衆穢所容幾難厠足蓋未嘗不慨然興歎也鎮洋畢公前撫陝之二載政通人和爰以暇日訪古至其地顧而悚息於是堂廡之傾圯者亟令繕完舊刻之陷於土中者洗而出之開成石經多失其故第復一一加以排比於外周以闌楯又爲門以限之使有司掌其啓閉廢墜之久劇然更新儒林傳爲盛舉及公之復莅秦中也乃并哀各郡邑前後所得金石刻始於秦訖於元著爲關中金石記八卷考正史傳辨析點畫以視洪趙諸人殆又過之夫人苟趣目前行往於先代所留遺不甚愛惜而亦無以爲後來之地儒生網羅放失亦能使古人之精神相煥發而

或限於其力之所不能必賴上之人實護而表章之以相推相  
衍於無窮其視治數之僅及於一時者相什伯也公之於政也  
綽有餘力故能百廢具興卽此亦其一也自

國朝以來爲金石之學者多於前代以余所知若崑山顧氏炎  
武秀水朱氏彝尊嘉興曹氏溶仁和倪氏濤大興黃氏叔璥襄  
城劉氏青芝黃岡葉氏封嘉興李氏光映邵陽褚氏峻錢塘丁  
氏敬山陽吳氏玉搢嘉定錢氏大昕海鹽張氏燕昌皆其選也  
繼此者方未有艾得公書而考之庶幾古今人之精神命脈不  
至中絕也乎

乾隆四十有七年季冬杭東里人盧文弨敘

金石之學與經史相表裏側藉異本任城辨於公羊吳殊文  
新安建於魯論歐趙洪諸家涉獵正史是正尤多蓋以竹帛之

文久而易壞手鈔板刻展轉失真獨金石銘勒出於千百載以前猶見古人真面目其文其事信而有徵故可寶也關中爲三代秦漢隋唐都會之地碑碣之富甲于海內巡撫畢公以文學侍從之臣膺分陝之任三輔漢中上郡皆校部所及又嘗再領總督印踰河隴度伊涼跋涉萬里周爰咨詢所得金石文字起秦漢訖于金元凡七百九十七通雍涼之奇秀萃于是矣公又以政事之暇鉤稽經史決擿異同條舉而作繫之正六書偏旁以糾冰英之謬按禹貢古義而求漢漣之源表河伯之故祠紬道經之善本以及三藏五燈之秘七音九弄之根偶舉一隅都超凡諦白非多學而識何以臻此在宋元豐中北平田概嘗撰京兆金石錄六卷其書雖不傳然陳氏寶刻叢編屢引之揆其體例僅紀撰書姓名年月初無攷證之益且所錄不過京兆一

路豈若斯記自關內山南河西隴右悉著於錄而且徵引之博  
辨析之精沿波而討源推十以合一雖曰嘗鼎一臠而經史之  
實學寓焉大昕於茲事篤嗜有年嘗恨見聞淺陋讀公新製如  
獲異珍它日校籍而求以補藏弄之闕則是編爲西道主人矣  
辛丑歲七月錢大昕序

關中金石記目次

卷第一秦二漢十三魏二晉一秦一北魏四周三隋十二石  
三十五五三

卷第二唐六十九金二石六十七

卷第三唐一百三

卷第四唐一百七梁二後唐二晉二周一

卷第五宋一百廿一金二石一百十九

卷第六宋二百金二石一百九十八

卷第七金五十五金四石五十一附劉豫五

卷第八元一百三金三石一百

計金十三五三石七百八十一共七百九十七以乾隆辛

丑歲七月開雕九月刻竟沅并識

開中金石記卷第一

鎮洋畢沅撰

秦

繹山碑

李斯篆在西安府學

秦刻不傳此卽宋徐鉉所摹淳化四年太常博士鄭文寶所刻末有文寶跋史記稱始皇廿八年東行郡縣上鄒嶧山立石卽此繹記作嶧金石刻因明白矣作刻石因明白矣中動作勤從童與婁壽碑固不動心字同又校官碑董並街彈碑以府承董察古文尚書董之用威董皆作董檀弓鄰重汪疇注重當爲童張公神碑仙僊卽仙童古重與童本通也或作戎从十古文甲字戎早等字因之攸作攸說文解字曰攸行水也從支入水省秦刻石作波今此作攸蓋用水省之意

優於許而與波則不相合矣親巡作親卹說文又曰窺至也  
輶車約輶亦古字通也又強作強上變口專作專中變田建  
作隹下變乚數作數譌串爲冑藥作襲譌爲巨者作習省  
右筆德作德省中華此皆於六書之正不合或是古本磨泐  
鉉臨寫時以意增改未可知又壹作壹金作金𠂔作𠂔極作  
極逆作逆此雖互異猶未失籀篆之正者也碑於明時中斷  
无當字

一曰衛二曰蘭池宮當長安志又有楚字无云秦作六國宮  
室於咸陽北坂用國號別之攷當時衛最後亡此无應卽其  
時造也蘭池宮遺址今亦在咸陽

漢

漢中太守郗君開石門道碑



永平六年刻分書在褒城北石門

字徑三四寸體界篆隸之間甚方整而長短廣狹不一余所見漢人書若諸城縣署內延光四年刻石亦此類也其文云永平六年漢中郡以詔書受廣漢蜀郡巴郡徙二千六百九十人開通褒余道太守鉅鹿郭君部掾治綬王宏史荀茂張宇韓岑弟其功作太守丞廣漢楊顯將相口始作橋格六百二十三口大橋五爲道三百五十八里郵亭驛置徒司空褒中縣官等口并六十四所口凡用功七十六萬六千九百口口瓦卅六萬九千八百共計一百二十四字合之宋晏袤所云一百三十九字共少十一字當是所紀歲月也袤文中似又有永平九年四月字樣或此泐始於六年成於九年後刻此石也中褒斜作余橋閣作格並古字通

敦煌太守裴岑紀功碑

永和二年八月立隸書在鎮西府北關 開忠義廟

岑漢書無名西域傳云漢自陽嘉以後朝威稍損諸國驕放  
轉相侵伐蓋當時車師內附呼衍每與爲難中國屢發諸國  
兵討之不利岑爲太守以本郡兵三千并禦能克敵全師故  
自紀其功若此

楊孟文石門頌

建和二年中冬立隸書在石門

碑云楊君厥字孟文故水經注稱爲楊厥碑攷之華陽國志  
則楊君名渙字孟文也洪适云厥實語助耳非名文內有云  
高祖受命興於漢中道山子午出散入秦以子午塗路並難  
更隨罔谷復通堂光說與郗閣頌嘉念高帝之開石門元功

不朽云云今出散入秦者散開也碑爲漢中太守健爲武陽王升立以健爲健用古字說文無健字

### 蒼頡廟碑

隸書在白水黃龍山廟內

是碑圭首上有穿文甚磨泐惟蒼頡天生德于大聖四目靈光數字可辨其陰多曹字蓋是當時人題名如兵曹曹賊曹之類兩側甚明晰有永壽二年延熹四年字樣側又有記故有大聖之遺靈以示來世之及下行因紀姓名等說其云萬年左鄉有秩萬年北鄉有秩蓮勺左鄉有秩池陽左鄉有秩者則是是方民衆之有得秩者司馬彪百官志以爲三老游微嚮天之屬也趙明誠以爲熹平中立余案碑側已有永壽年號則非熹平可知

西嶽華山廟碑

此碑世有兩本一爲商邱宋氏棨所藏一爲華州王宏撰所藏皆宋搨也宋氏本雍正初姜任修摹刻于揚州郭本今爲曲阜孔繼涑所刻兩本字殘泐處悉同世又有所謂全本則不足信

開西狹頌

建寧四年六月刻隸書在成縣

文云漢陽阿陽李君諱翕字伯都漢陽前漢爲天水郡永平十七年更名後有黃龍嘉禾白鹿承露人木連理五瑞圖後云君昔在龍池修肴嶽之道致此瑞因其地異故洪氏分爲二碑實非也看版謂之肴嶽者因公羊傳以爲嶽巖故也攷說文亦謂之岑岑諱翕歐陽修以爲會非

建寧閣頌

建寧五年二月刻隸書在略陽

此碑刊于崖上自宋時已泐今更甚明中如填翻本惡劣不堪兼多增改好古者爲所惑亂今特以洪文惠隸釋所載者辯之序內濤波滂沛滂誤作滴減西□□增作減西濟□□□□□增作巨驪□□頌內□□□□增作上帝綏□愛民如□□□平均增足子遐邇三字豐稔□□□□樂增足年登居民四字□□□□分川兌之間增作曰析里之□川兌之間□□□□□□以析分增作西隴開峙兮東以析分聖朝閔伶伶誤作憐耗艾究□兮幼□□□□校傾兮全育□遺改作分荷杭壤兮乃命是君□歷救傾兮全育□遺黃邵朱葉兮蓋不□□□□充贏兮百姓歡欣改作拯溺亨

屯兮瘡痍始起閭閻充盈兮百姓歡欣豈有洪氏不能見其  
全而今反明晰且顯與洪氏兩異者予以知明時人之誣妄  
若此

碑後題從史□□□□字漢德爲此頌者隸續云天井道  
碑題名內有仇靖字漢德故更下辨□□□子長書此頌者  
天下碑錄云仇子長名紉撰書人著名自此始華山碑有郭  
香察書洪适以爲察人之書非以香察爲名也

司隸校尉楊淮碑

熹平二年二月立隸書在石門

淮謚文之元孫字伯邳

郃陽令曹全紀功碑并陰

中平二年十月立隸書在郃陽

後漢書西域傳云靈帝建寧元年疏勒王與漢大都尉於獵中爲其季父和得所射殺和得自立爲王三年涼州刺史孟佗遣從事任涉將敦煌兵五百人與戊巳司馬曹寬西域長史張晏將焉耆龜茲車師前後部合三萬餘人討之攻積城四十餘日不能下引去其後疏勒王連相殺害朝廷亦不能禁今碑云和得殺父篡位君興師征討和得面縛歸死傳無面縛歸死之文此應從史碑附會言之耳所稱和德卽和得得與德通寬亦卽全全與寬通也

仙人唐公房碑

年月並缺隸書在城固壻鄉

水經注云公房城固人也升仙之日壻行未返不得同階雲路約以此川爲居因號曰壻鄉壻水亦卽名焉今案此碑稱

公房以王莽居攝二年與真人期于壻谷口山上則是公房未升仙之日其水與鄉已號曰壻矣并無壻行未還之說道元不知何所據也

武都太守等題名殘碑

無號年隸書在華嶽廟

右題名共七行云民故武都太守□□□躬尋節故功曹司隸茂才司空掾池陽郭旺公休故功曹司空掾池陽吉華伯房故功曹司空掾蓮句田巴叔鸞故功曹司空掾池陽吉充叔才故功曹大尉掾頻陽游殷幼齊故功曹大尉掾池口吉苗元齋一人爲一行也首行下有故督郵三字次行下有故五二字三行下有故一字稽其官制地名是漢時碑陰無疑然攷隸釋隸續及金石集古等錄並無此刻乾隆四十四年



修理嶽廟五鳳樓下所出古碑殘石甚多此爲稱最焉

十三字殘碑

隸書在邵陽

今在邵陽康姓宰莘退食記云十三字碑向置曹全碑之旁  
今亡矣不知爲康姓移去耳

瓦當字

右共十五種並篆書一曰延年益壽二曰千秋萬歲三曰長  
生未央四曰長生無極五曰長樂未央六曰與天無極七曰  
億年無疆八曰益壽存富九曰都司空瓦十曰宗正官當十  
一曰右空十二曰上林十三曰上林農官十四曰永奉無疆  
十五曰長毋相忘李好文長安志圖說載有七種今無儲胥  
未央萬壽無疆二種而別出者又得九種可見古物之未經

前人見者猶多也宗正宮高帝七年二月置

魏

盪寇將軍李苞題名

景元四年十二月立隸書在石門中

文云景元四年十二月十日盪寇將軍浮亭侯譙國李苞字  
孝章將中軍兵石木工二千人始通此閣道苞字作苞前有  
潘宗伯韓仲元題名一行亦隸書其歲月莫可攷附置于此  
十八字殘碑

隸書在邵陽

今在邵陽屈姓中有黃初五二字可辨

晉

蘭亭序

永和九年三月王羲之行書在咸陽

此卽醴泉苟氏本今爲咸陽人所有後有董其昌跋蓋明時所刻也

秦

廣武將軍□產碑

建元二年十月立分書在宜君

文有云使持節冠軍將軍益州刺史上黨公之元孫又云建忠將軍□□護軍扶風太守遷□匡侯之□子諱產字下缺又有與馮翊護軍云云皆未詳其事蹟上有額作立□山石祠五字又有陰刻部將姓名

鬼

石門銘

永平二年己丑正月立王遠撰文并正書在石門中  
遠無書名而碑字超逸可愛又自歐趙以來不著錄尤可寶  
貴也序文有云此門爲漢永平中所開卽指鄒君事言之鄒  
君爲漢中太守甚有功于民而史志家皆不載其人碑又遺  
其名字余甚惜之

曹續造象銘

大統五年二月立隸書

文云見治富平令曹并邑子三十四人案其左方有造象人  
名大槩卽邑子三十四人也有一人亦並作一像曹時封頻  
陽縣開國男

造象殘刻

無號年隸書並在富平

右刻與曹續造象制度略同皆列魏姓人名一人亦各爲一像因無歲月可稽附置于此

松滋公元萇振興溫泉頌

無年月正書篆額在臨潼靈泉觀

碑額三十六字字體奇詭不知所自云魏使持節散騎常侍都督雍州諸軍事西安將軍雍州刺史松滋公河南元萇振興溫泉之頌萇于孝文時以代尹除懷朔鎮都大將宣武時爲北中郎將帶河內太守歷侍中雍州刺史是碑所作當在宣武時也本傳稱萇襲爵松滋侯例降侯賜艾陵伯降侯爲伯在孝文大統十六年是碑仍稱松滋者當是尊崇其世爵故不及其所降之爵也亦俗情如此耶

聖母寺四面象銘

保定四年九月立正書在蒲城東北鄉二十里

豆盧恩碑

隸書在咸陽洪濱原

碑無號年以文內有保定元年之語故附置于此

華山神廟碑

天和二年十月立萬紐于瑾撰文趙文淵隸書篆額在華嶽廟

周書唐瑾本傳瑾封姑臧縣子進爵臨淄伯論平江陵功進爵爲公子志寧撰瑾碑乃言封永昌子不及姑臧周書亦彼時所撰何兩異耶文稱太師大冢宰晉國公者宇文護也碑中虞書字作𡗗見左傳正義云石經古文作𡗗清歌字作哥

見說文云古文以爲歌字惟旃蒙字作旃則不解其義攸字从千作攸暇字从目作暇是時書體徧旁之謬類如此

隋

佛座記

開皇四年九月立正書在西安府城北雷神廟

淮安定公趙芬殘碑

開皇口年十二月立正書撰書人姓名缺在西安府城東中兆村

安喜公李使君碑

開皇十七年二月立隸書篆額撰書人並缺在乾州上官村使君涼武昭王之後祖景超父通逸季父琰之通逸官至使持節東南道都督狄道縣開國子官亦不界而名氏不見于

史記獨琰之魏書有傳因知史家缺略爲多也碑三截字畫  
工好使君名缺不詳

海陵郡公賀若誼碑

號年缺正書無撰書人姓名在興平縣學

隋書本傳誼在魏以功臣子賜爵容城縣男遷直閤將軍大  
都督通直散騎常侍尚食典御在周拜車騎大將軍儀同三  
司略陽公府長史除司射大夫封霸城縣子轉左宮伯加開  
府歷靈邵二州刺史原信二州總管尋罷復熊州刺史遷洛  
州封建威縣侯進位大將軍拜亳州總管進封范陽郡公授  
上大將軍在隋爲右武侯將軍河間王北征爲副元帥轉左  
武侯大將軍免拜華州刺史轉敷州改封海陵郡公轉涇州  
拜靈州進位在國碑叙次往往與本傳合誼之加開府在周



閔帝受魏禪之後碑云三年者當是明帝武成三年其治熊  
州在武帝時碑云建德年較傳更明晰但不及坐兄敦及左  
武侯後兩次免職事耳碑文下半截殘闕

舍利塔銘額

仁壽元年十月立隸書在大荔

今銘已失只此額存上有楊繼宗等題名

唐高祖爲子祈疾疏

大業二年正月立正書無姓名在郿縣草堂寺

高祖于隋歷蒲關岐三州刺史大業中爲滎陽太守此云鄭  
州刺史當卽是守滎陽時所造

虜揚卽將義城子梁羅墓志

大業四年八月立正書在西安府城南杜曲

舍利塔銘

大業五年正月立正書在終南山

文云京兆府大興縣御肅鄉便子谷至相道場建立佛舍利塔御肅鄉卽御宿川也古肅與宿通祭統宮宰宿夫人注宿讀爲肅少牢饋食禮前宿一日宿戒尸注宿讀爲肅特牲饋食禮乃宿尸注宿讀爲肅古文宿皆作羞凡宿或作速記作肅周禮亦作宿案肅與宿通宿又與羞通然則漢時所謂御羞苑者義與御宿亦同矣便子谷當卽樛梓谷

常醴奴墓志

正書在興平學

碑方尺餘字甚精整

正草二體千字文

智永書在西安府學

此碑乃宋大觀己丑二月所刻者後有薛嗣昌跋石漸磨泐  
余家有宋拓本爲義門何焯所藏甚可寶也

李衛公上金天王書

無號年行書在華嶽廟內

此碑乃後世好事者所刻就文義觀之應是衛公未遇時所  
爲攷唐書本傳靖初仕隋爲殿內直長大業末遷馬邑丞故  
附置于此

寶慶寺瓦頭

右爲長安寶慶寺五字寺字居中篆書在咸寧花塔寺

關中金石記卷第二

知洋畢沅撰

唐

宗聖觀記

武德九年二月立歐陽詢撰序并隸書陳叔達撰銘在盤屋樓觀

是碑末有中統元默闡茂之歲命工鈔別行是元時已經開鐫信本楷正名高千古其隸書如房彥謙神道今已失傳藉此碑存猶足見其遺範然又爲後人所剗壞殊屬可惜

孔子廟堂碑

武德九年十二月立虞世南正書長安三年四月相王旦篆額在西安府學

碑舊無額至武后時始命相王書之額本作大周孔子廟堂

之碑八字文宗朝爲祭酒馮審珪去黃庭堅云碑末有長安  
三年太歲癸卯金四月壬辰水朔八日己亥木書額行亦相  
王所書又有朝議郎行左豹衛長史直鳳閣鍾紹京奉相王  
教勅勒碑額雍州萬年縣光宅鎬字行庭堅云者因此數行  
宋時已無之亦當爲審所琢彥超翻本更不復用武周舊樣  
也彥超以周恭帝時加檢校太師宋初兼中書令太平興國  
中封邠國公此題云檢校太師兼中書令琅邪郡開國公者  
當是宋初所刊琅邪郡公猶是周時爵號也

寶室寺鐘銘

貞觀三年歲寶月造正書在邠州

略云邠州寶室寺以大唐貞觀三年樞提在歲歲寶御律景  
丁統日己巳司辰用銅三千斤鑄鐘一口大鐘主趙夷杜茂

大鐘主上大將軍張神安文詞清綺字法工雅非唐初人不  
能爲之昔趙德文集錄始懷州寧照寺鐘係景龍三年此足  
與之較勝矣

邕禪師舍利塔銘

貞觀五年十一月立李伯樂撰文歐陽詢正書在終南山  
九成宮醴泉銘

貞觀六年四月立魏徵撰文歐陽詢正書并篆額在麟遊  
唐書地理志本隋仁壽宮義寧元年廢貞觀五年復置更名  
周垣一千八百步并置禁苑及武庫官寺等焉

右僕射虞公溫彥博碑

貞觀十一年十月立岑文本撰文歐陽詢正書篆額在醴泉  
烟霞洞

彥博以貞觀四年封虞國公十年遷尚書右僕射

昭仁寺碑

貞觀四年十月立朱子奢撰文正書篆額無姓名在長武  
此碑不載書人宋張重威謂是虞世南書今案筆蹟與李衛  
公神道同疑是王知敬書

滕州刺史張琮碑

貞觀十三年二月立于志寧撰文正書姓名缺在長安北原  
案碑撰書人姓名並缺其撰人但有庶子黎陽公五字可辨  
攷志寧當時正官太子右庶子封黎陽郡開國公故定爲志  
寧所撰文云祖母李景皇帝之女贈信都大長公主蓋是定  
國後追贈之人故史不及之

左屯衛將軍姜行本勒石之紀文

貞觀十四年閏六月立正書在鎮西府松樹塢

此卽太宗詔伐高昌魏文泰事也唐書高昌傳稱侯君集爲  
交河道大總管薛萬均薩孤吳仁副之契苾何力爲慈山道  
副大總管牛進達爲行軍總管率突厥契苾騎數萬討之據  
此云口孤吳仁領右軍十五萬牛進達領兵十五萬與史言  
相合中叙君集封陳國公行本封通川縣男史俱不及行本  
傳云高昌之役爲行軍副總管出伊川距柳谷百里依山攻  
械其地有漢班超紀功碑行本磨去古刻更刊頌陳國威靈  
應卽是碑也文後有瓜州司法泰軍河內司馬太真詞具行  
當爲撰文入姓名

襄國公段志元碑

貞觀十六年立正書篆額在醴泉儀門村



寶刻叢編云志元碑無書撰人姓名

唐書本傳云志元臨淄人此作鄒平傳云謚忠肅此作忠壯  
申文獻公高士廉塋兆記

許敬宗撰文趙模正書在醴泉劉洞村

案集古錄以爲貞觀二十一年立趙模卽太宗命書蘭亭序  
者字畫甚工

故國子祭酒孔穎達碑

貞觀二十六年立于志寧撰文正書篆額無姓名在醴泉西  
谷村

案金石錄世傳虞世南書據碑文穎達卒時世南之亡久矣  
蓋規撫永興者也

皇甫誕碑

貞觀中追建于志寧撰文歐陽詢正書在西安府學

碑文多與史不合隋書本傳誕字元慮安定烏氏人碑則云字元憲安定朝那人本傳高祖受禪爲兵部侍郎出爲魯州刺史碑則云授廣州長史益州總管府司法無兵部及魯州兩節本傳叙遷治書侍御史後爲河南道大使還判大理少卿明年遷尚書右丞以母憂去職起轉尚書左丞碑則云遷治書侍御史授大理少卿尚書右丞丁母憂起復詔持節爲河北河南道安撫大使入爲尚書左丞此並當以碑爲正碑子民部尚書滑國公無逸追建

褚亮碑

八分書篆額在醴泉西谷村

昭陵石刻記云碑與馬周碑如出一手當是殷仲容書也亮

遂良之父貞觀中封陽翟侯碑無號年因其卒于貞觀時故附置于此

太尉梁文昭公房元齡碑

號年缺褚遂良正書篆額無姓名在醴泉烟霞洞

芮定公碑

永徽元年六月立李義府撰文正書無姓名在醴泉西谷村  
芮定公者豆盧寬也唐書欽望傳祖寬高祖初擢殿中監子  
懷讓尚萬春公主貞觀中遷禮部尚書左衛大將軍芮國公  
卒贈特進并州都督諡曰定此碑額題曰唐故特進芮國公  
與史所稱正合文甚泐趙氏金石目錄以爲義府所撰當無  
誤也

豆盧氏本慕容之後有名良者於魏封北地王始賜此姓元

和姓纂云慕容連北地王之後

三藏聖教序

永徽四年十月立太宗撰文褚遂良正書并隸額

劉軻撰三藏大遍覺塔銘曰貞觀廿年秋七月法師進新譯經論請制經序序成神筆自寫太宗居慶福殿百寮陪位坐法師命上官儀讀之卽此序

三藏聖教序記

永徽四年十二月立高宗撰文褚遂良正書并篆額並在咸寧慈恩寺

劉軻撰三藏大遍覺塔銘曰貞觀廿二年夏天皇大帝居春宮又制述聖記及菩薩藏經後序據此則高宗所作又有藏經序也手荅稱所作論序鄙拙尤繁以此今序不傳

萬年宮銘

永徽五年五月立高宗御製並正書篆額在麟遊

唐書地理志九成宮永徽三年改曰萬年宮乾封二年復曰九成

碑陰題名

此刻上下分二層字兼行楷大小亦不一冊府元龜曰永徽五年五月制萬年宮銘刻石于永光門外仍令中書門下及文武三品以上并學士自書名位于碑陰刻之金石錄等書並作六年非是

定公韓良碑

永徽六年三月立于志寧撰文王行滿正書篆額在富平縣學

良韓瑗之父唐書作仲良蓋碑舉其名而傳及其字也官終  
刑部尚書泰州都督府長史潁川縣公

贈太常卿汾陰獻公薛收碑

永徽六年八月立于志寧撰文正書篆額姓氏缺在醴泉儀  
門村

唐書本傳云永徽中贈太常卿不及贈諡可以補史之缺  
崔敦禮碑

于志寧撰文于立政正書在醴泉西谷村

案集古錄顯慶元年十月立庚子銷夏記作王知敬書誤  
化度寺僧海禪師方坟記

顯慶二年四月立正書在長安白塔寺

塔在信行禪師塔之次

禮部尚書張允碑

顯慶三年三月立正書篆額在醴泉西谷村

文云故金紫光祿大夫張允以唐書儒學傳攷之當卽是張  
後允復齊碑錄云李義府撰文

衛景武公李靖碑

顯慶三年五月立許敬宗撰文王知微正書在醴泉劉洞村

王居士磚塔銘

顯慶三年十月立上官靈芝撰文敬客正書在終南山

鄂國公尉遲恭碑

許敬宗撰文正書篆額在醴泉小陽村北

案集古錄顯慶四年三月立

蘭陵長公主碑

顯慶四年十月立李義府撰文正書額同在醴泉下古  
新書本傳謂公主名淑字麗貞下嫁竇懷哲懷哲太穆皇后  
之族子考之碑則云太穆皇后之孫宰相世系表在第五格  
爲后父毅之元孫三者皆不合若從碑則族子亦無稱孫之  
理或是族子之子爲族孫於后爲族祖姑與

夫人程氏塔銘

顯慶四年立正書在西安府城南

碑石失去一角云夫人程氏塔銘者蓋俗家夫婦用浮屠法  
安厝者也

冠軍大將軍代州都督許洛仁碑

龍朔二年十一月立撰書人姓名缺在醴泉儀門村

洛仁世緒弟也唐書附見世緒傳末洛仁字濟祖諱彪齊武



川鎮將襲爵寧國郡公父諱□梁州刺史□夏縣開國公傳  
不及之詳此碑

三藏聖教序記

龍朔三年五月立褚遂良正書在同州府學

遂良以顯慶三年卒在龍朔前應是前所書龍朔時始刻于  
此也

道因法師碑

龍朔三年十月立李儼撰文歐陽通正書并題額在西安府  
學

此碑題額上書三菩薩名字與碑文大小略同審之亦通筆  
也前人並未錄過

杜君綽碑

高正臣正書在醴泉

案碑文有龍朔□年字知高宗時立

騎都尉李文墓志

麟德元年二月立正書在同州

于志寧碑

乾封元年十一月立令狐德棻撰文子立政正書在三原長  
坳鄉

文云大業十年爲清河縣長唐書列傳以爲冠氏又不及自  
中書侍郎遷兵部授蒲州刺史不赴後爲衛尉卿判太常卿  
以本官兼雍州別駕遷禮部尚書諸事此當以碑補正史書  
者也

紀國先妃陸氏碑

正書篆額在醴泉西屯村

案妃河南洛陽人父爽尚書庫部兵部二曹郎中以貞觀十七年冊爲紀王妃麟德二年六月薨詔陪塋昭陵以乾封元年十二月塋于陵南二十二里紀昭陵陪塋者及金石文字諸書皆未載

道安禪師塔記

總章三年二月立正書在長安百塔寺

淄川公李孝同神道碑

咸亨元年五月立諸葛思禎正書在三原

孝同淮安王神通之子

張阿難碑

咸亨二年九月立僧普□正書篆額在醴泉西谷村

案碑書咸亨爲咸亨者古亨享字同也如漢劉熊碑子孫之張公神碑元亨利貞並是後人畫爲兩字者非

### 高唐縣公馬周碑

上元元年十月立許敬宗撰文殷仲容隸書篆額在醴泉下古村

周以貞觀五年爲中郎將常何薦令直門下省修起居注六年拜監察御史擢給事中八年行侍御史加員外散騎侍郎十二年轉中書舍人十五年遷治書侍御史兼知諫議大夫檢校晉王府長史十七年拜中書侍郎兼太子右庶子十八年爲中書令二十年以本官攝吏部尚書明年晉銀青光祿大夫二十二年正月九日太宗本紀作庚寅薨贈幽州都督卽以其年三月詔陪葬昭陵高宗永徽二年加贈尚書右僕射高唐

縣開國公二史叙次官爵略同唯八年加員外散騎侍郎則缺者也以治爲持避高宗諱改

阿史那忠碑

正書篆額在醴泉西谷村

案集古錄作上元二年金石錄作咸亨四年元和姓纂云阿史那氏開元中改爲史唐書列傳云忠尚宗室女定襄縣主詔姓獨著史碑建于高宗時並不言改姓唐書誤也姓纂爲是

贈太尉揚州大都督英貞武公李勣碑

儀鳳二年十月立高宗御製並行書在醴泉劉洞村

此碑爲高宗行書惟碑題下御製御書四字及後儀鳳年月字則正書陰有宋游師雄跋

碑叙次與本傳略同惟討劉武周一節傳不及之耳中稱王世充爲王充實建德爲實德因避太宗偏諱牽連及之也勣薨于總章二年春秋七十有六傳云八十六者非起家准衛霍故事象烏德鞬山及陰山鐵山以旌破北狄東夷之功游師雄云墳高七十五尺東西綿延七十五步周圍二百步碑高二丈二尺廣五尺八寸五分蓋坐甚偉

晉州刺史順義公神道碑

號年缺正書篆額在醴泉

順義公不詳其人據京兆金石錄以爲卽裴藝碑亦褚遂良所書因附置于此

姜遐碑

姪郕公暉撰文并正書

遐姜慕之孫行本之子史附見其兄簡傳但云簡弟柔遠則  
天時仕至左鷹揚衛將軍通事舍人內供奉而已晞卽簡之  
子也晞代簡襲行本爵爲郕國公遐之子名皎諸書但詳行  
本陪塋昭陵而不及遐攻昭陵陪塋例子孫願從祖父塋者  
聽遐以丁內憂起復不餘年而卽卒當是從父塋于昭陵本  
不得與陪塋者同例也

### 王君碑

正書並在醴泉莊河村

文云右監門將軍王君又云武德九年授內侍貞觀四年遷  
右監門將軍進爵爲公加正議大夫又云吐谷渾據龍沙又  
云出使吐蕃又云二十二年遷使持節其人蓋以宦官而與  
李衛公同征吐谷渾者也碑缺其名此唐時宦寺封公侯之

始

述聖紀

文明元年八月立武后撰文中宗正書在乾州乾陵

碑折爲數段今存兩截

美原神泉詩

垂拱四年四月立尹元凱篆書在富平美原鎮

右詩刻面陰皆有文面額題云美原神泉詩序六字隸書文  
首行題云五言夏曰旂神泉序序爲太原縣尉韋元旦字烜  
作序後詩二首一爲王簿賈言淑一亡姓名詩皆六韻陰額  
題云大唐裕明子書六字亦篆書文首行題云五言同韋子  
旂神泉詩非序序爲雲陽王簿明臺子徐彥伯字光作序後  
詩三首一爲裕明子河間尹元凱字械一爲左司郎中溫翁



念字敬祖一爲天官員外郎李鵬字至遠詩亦六韻垂拱四年戊子四月造趙德父以四年作元年者非韋元旦史稱其兩爲縣尉一爲東阿一爲感義而不及太原尹元凱史稱爲瀛州樂壽人而碑云河間地理志云深州有樂壽縣本隸瀛州大歷中來屬則其時樂壽猶屬瀛州也又河間亦屬瀛州元旦等史或不著其字並詳此碑

澤王府王傅梁師陳并夫人唐氏惠兒墓志銘

垂拱四年十一月立四品孫義陽朱賓撰文五品孫榮陽鄭莊正書在終南山檀梓谷

左領軍衛將軍乙速孤神慶碑

載初二年二月立苗神客撰文釋行滿正書篆額在醴泉叱干村

神慶字昭祐本姓王氏五代祖顯魏時爲驃騎大將軍賜姓  
乙速孤居京兆之醴泉行儼卽其子也兩墓相去不十餘步  
二碑並峙

珍州榮德縣丞梁師亮墓志

萬歲通天二年三月立正書無撰書人姓名在長安百塔寺  
思亮字永徽安定烏氏人起家左春坊別教習生以突厥入  
寇轉粟功授上柱國修乾陵補隱陵署丞謫授榮德縣丞卒  
生平無甚著聞可見者如斯而已書者筆蹟工整猶有歐虞  
遺法文中多用武后新字鄭樵六書略所載爲板本所亂以  
此與契苾明等碑攷之庶得其正云

明堂令于大猷碑

聖歷三年十一月立正書撰書人姓名並缺在三原長坳鄉

其略云公諱大猷字徽本曾祖宣道隨內史舍人左衛率誠  
安縣開國子皇朝贈使持節都督涼肅甘瓜沙五州諸軍事  
涼州刺史謚曰獻祖志寧禮部尚書侍中尚書左僕射太子  
太傅太師上柱國燕國公贈使持節都督幽易媯檀平口六  
州刺史幽州刺史謚曰定父立政尚書吏部郎中國子司業  
太子率更令榮號二州刺史太僕少卿上護軍攷唐書于志  
寧傳載志寧官爵頗詳於封燕國公後加尚書右僕射同中  
書門下三品兼太子少師顯慶四年解僕射拜太子太師出  
爲榮州刺史改華州卒贈幽州都督與碑不甚相合宣道贈  
官與謚亦不及之此並可補正史書缺誤

順陵殘碑

長安二年正月立武三思撰文相王旦正書在咸陽

此武后追尊其母楊氏之碑也今止存三塊得百餘字一在  
縣署一在縣學一在北原

王璿造象銘

長安三年七月立王無忌正書

高延貴造像銘

長安三年七月立正書

姚元之造像銘

長安三年九月立正書

元之時爲鳳閣侍郎與史傳令

李承嗣造像銘

長安三年九月立正書

文云李承嗣爲尊親造阿彌陀像一鋪唐時造像皆稱一軀

唯此與岱嶽觀馬元貞所造元始天尊像作鋪又軀或作偃  
以此爲異

韋均造像記

長安三年九月立正書

蕭元春造像記

長安三年九月立正書

梁義深等造像銘

無號年正書

右共九人梁義深李善才楊敬法杜懷敬張光泰林招隱馬

元收蘇仁義趙元志皆內官亦應是長安時人故附于此

姚元景光宅寺造象銘

無年月正書以上並在西安府雁塔寺

法門寺千佛像碑

無年月在扶風

碑面作千佛共二十五行行四十象有額額中作釋迦坐象旁二大士侍立不詳何時所造其陰及兩側書涅槃經內日月字作㊦㊧疑是武后時製故附置于此

王三娘坟記

神龍二年二月立正書在西安府城南

比邱尼法琬碑

景龍三年五月立釋承遠撰文劉欽旦正書在西安府學

碑稱高祖景皇帝曾祖故鄭王亮謚曰孝祖神口荆揚并三州刺史大都督襄邑王謚曰恭父德懋少府監宗正卿兵部尚書臨川公謚曰孝以唐書攷之祖名神符也德懋爲刑部

尚書碑云兵部者吳

許公蘇瓌神道碑

景雲元年十月立盧藏用撰序并隸書張說撰銘在武功  
碑文與唐書本傳並合惟神龍初爲尚書右丞後曾封懷縣  
男碑不及之耳

蕭思亮墓志

景雲二年二月立顏惟貞撰文正書篆蓋在咸寧神禾原  
案顏惟貞魯公父從舅氏殷仲容授筆法此志疑卽其所書  
也唐時墓志篆蓋皆缺此獨有

景龍觀鐘銘

景雲二年九月造唐宗撰文並正書在西安府迎祥觀

馮本紀孝之碑

先天元年十一月立周朝隱撰文子敦直隸書篆額在高陵縣城西

右碑中斷金石家以上截作亳州錄事參軍殘碑下截作紀孝碑者非是

涼國契苾明碑

先天元年十二月立婁師德撰文殷元祚正書篆額在咸陽明契苾何力之子也碑作河力唐時單干稱可汗其次謂之特勤柳公權神策軍碑所謂大特勤盟沒斯者是也又或作勒勤亦謂之特勒今此作勒與柳書同字形相近必有一誤案北魏書有宿勤明達北史作宿勒其誤與此同



關中金石記卷第三

鎮洋畢沅撰

唐

馮十一娘墓志

開元三年四月立正書篆額在寶雞縣丞署

案額云唐故馮氏婦墓志之銘題云唐將作監主簿孟友直女墓志十一娘字心河閬人也年十九適馮貞祐明年終于洋州興道縣廨舍留葬陳倉縣之興平原父母爲之立志其略如是此石以乾隆己卯年出土從前金石家所未著錄者

法藏禪師塔銘

開元四年五月立田休光撰正書在長安終南山

兖州都督于知微碑

開元七年六月立姚崇撰文正書在三原

神國昭宣公王仁皎神道碑

號年缺張說撰文明皇隸書額正書御書二字在同州羌白鎮

舊唐書仁皎本傳仁皎以開元七年卒令張說爲其碑文元宗親書石焉攷兩書本傳所載並合惟擢將作大匠後轉太僕正卿新書不及之耳碑自歐趙至今從未著錄

贈秦州都督李昭公神道碑

開元八年六月立李邕撰文并行書在蒲城橋陵

俗名雲麾將軍碑與今在順天府廨中者自是二物此名思訓順天府廨中者名琇並是北海書趙岫曰朱秉器謂良鄉亦有此碑即順天府廨本此爲趙文敏臨書岫謂此是思訓墓處乃北海真蹟非文敏所能良鄉本肥媚文敏書無疑朱趙漫不

置攷贅斷可笑今瑋碑已爲柱礎不知何時自良鄉移置府  
廨思訓碑下截亦爲村人所鑿磨泐不可辨矣

華嶽精享昭應之碑

開元八年立咸廩撰文劉升隸書李休光題額在華嶽廟  
李休光舊作光休誤蘇題以是年正月罷相爲禮部尚書碑  
云舊相尚書許國公與史正合升史作昇有傳

鎮軍大將軍吳文碑

開元九年十月立撰人缺釋大雅集晉王羲之行書在西安  
府學

明萬歷末浚西安府城濠得此碑于土中移之于學中存半  
截故俗稱爲半截碑文以鎮軍大將軍行右監門衛將軍則  
是唐時一內官也文中神龍三年下有所謂唐元年者應是

唐隆元年避元宗諱去一字耳

御史臺精舍記并題名

開元十一年立崔湜撰文梁昇卿隸書在西安府學

碑爲昇卿追書題名內有天寶元載云云攷天寶三年始改  
年爲載題名非一時所爲當亦因追書致誤

題名有三格其上格爲侍御史中爲殿中侍御史下爲監察  
御史侍御史時謂之臺院殿中侍御史謂之殿院監察御史  
謂之監院唐時所稱三院者是也

後漢書包咸傳稱咸任東海立精舍講授然則精舍乃講授  
之地以爲佛寺廬舍始于五臣注任彥昇表湜蓋本之

京兆總監茹守福墓志

開元十一年八月立正書在咸寧香積寺

州刺史馮仁□碑

開元十一年十一月立崔尚撰文郭謙光隸書篆額在咸陽長陵西

仁□道士馮道力父也道力與劉成祖占元宗當受命潛布欵誠開元中道力拜銀青光祿大夫冀國公而又拜其父朝散大夫使持節池州刺史文中稱意得元珠謀叅黃石同心戴舜以爲天子卽指其事也攷道力以開元十年坐姜皎事配流雷州蓋後一年始立此碑是時詔百官不得與卜祝之人往來而猶有人爲伊父立碑者何耶謙光卽書韋維神道之人

高福墓志

開元十二年正月立孫季良撰文正書在咸寧農家

福字延福武后時中人初爲奚官局丞轉局令再轉宮閤局令兼內謁者監以養子力士貴拜中大夫守內侍上柱國新書力士傳云力士馮盎曾孫中人高延福養爲已子因冒其姓又云力士幼與母麥相失後嶺南節度使得之隴州帝爲封越國夫人而追贈其父廣州大都督延福與妻侍養亦與麥均舊書云力士義父高延福夫妻正授供奉與碑稱仿佛皆合力士以誅蕭岑功拜右監門衛將軍碑云大將軍蓋史是唐制左右監門衛大將軍正三品將軍從三品力士之封大將軍在天寶初此時未得稱此也中官以內侍爲最貴內侍拜將軍自開元以前無之唐六典云中官之貴極于內侍若有殊勛懋績則有拜大將軍者然仍兼本職六典作于是時殆卽因此等事言之耳季良名翌以字行會要稱季良以

校書郎爲集賢院直學士攷集賢院卽麗正殿爲開元十三年改名是碑題云麗正殿修撰孫翌季良是在院名未改之前可知

此碑向在農家幾爲柱礎者數矣乾隆辛丑五月余以二萬錢購得之今移置于靈岩山館

香積寺王淨業法師塔銘

開元十二年六月立畢彥椎撰文正書無姓名在長安香積寺

虢國公楊花臺銘楊將軍新莊像銘

開元十二年十月立申屠液撰文正書在咸寧花塔寺

虢國公者楊思勗也思勗以開元十二年平單行章進輔國大將軍封虢國公像卽其時造也是銘爲二石前石有序無

銘自廿二行乃爲銘曰以後但署撰人姓名而無歲月後石有銘無序自十七行以後記開元歲月而無撰人二石實是一物舊分爲二者誤也

涼國長公主神道碑

開元十二年十一月立蘇頲撰文明皇隸書在橋陵  
公主字華莊始嫁薛伯陽伯陽坐父稷流嶺表改嫁溫彥博  
曾孫職史于公主傳但及伯陽于溫彥博傳不言改嫁碑則  
全諱薛事蓋是時薛已配流自殺矣

明皇華山銘殘字

開元十二年十一月立明皇撰文并隸書在華嶽廟  
今只存駕如陽字四字駕如者仙駕如問句也陽孕者陰陽  
孕育句也碑爲黃巢所毀故自歐趙以來不著錄



乙速孤行儼碑

開元十三年二月立劉憲撰文白羲臣隸書并篆額在醴泉叱干村

行儼神慶之子于高宗時爲普濟府左果毅垂拱初爲黃城府左果毅新唐書地理志不載二府名未詳所屬碑稱顯慶爲明慶避中宗諱改

鄧國長公主神道碑

開元十三年四月立張說撰文明皇隸書在橋陵

公主睿宗第八女碑云第七者以安興昭懷蚤死故也公主崔貴妃所生始嫁薛儼又嫁鄭孝義前有子四後有子三碑皆不詳今碑殘缺文載唐文粹甚詳大概皆與史合惟言食邑一千二百戶爲稍異耳亦無足重輕也

文有云帝唐降女天乙歸妹用易帝乙歸妹文也天乙者湯之字京房載湯嫁妹之辭曰無以天子之尊而乘諸侯無以天子之富而騎諸侯陰之從陽女之順夫本天地之義也在事爾夫必以禮義者卽指其事後世或以帝乙作紂父帝乙者非案王伯厚云子夏傳易荀爽對策並以帝乙爲湯不云紂父知古訓同

述聖頌

開元十三年六月立達奚珣撰序呂向撰頌并正書在華嶽廟

頌以述聖名者以元宗有西嶽碑銘因述而頌之也元宗銘曰十有二載孟冬之月步自京邑幸于洛師停鑾廟下以唐本紀攷之卽十二年十一月庚午如東都事碑云孟冬史云

十一月徵有異向本傳叙向以開元十年召入翰林院兼集  
賢院校理擢左拾遺進左補闕帝爲文勒石西嶽詔向爲鐫  
勒使以起居舍人從東巡元宗之封太山在十三年十一月  
案孫逖有春初送呂補闕往西嶽勒碑詩是向以是年春奉  
命華山後卽從往太山矣攷會要華嶽碑十三年七月七日  
成則向之進起居舍人卽以鐫勒功而從太山在七月後更  
可知又向本傳不及向爲集賢殿直學士趙冬曦傳云冬曦  
與秘書少監賀知章校書郎孫季良大理評事咸廩業入集  
賢院修撰是時翰林供奉呂向爲校理踰年並爲直學士此  
史家互見之例非缺略也但云踰年並爲直學士而集賢院  
卽以十三年改名此碑立于十三年六月則向之爲直學士  
獨未踰年矣珣後由御史爲河南尹從祿山爲右相至德二

年伏誅趙氏金石錄置此于開元無歲月諸碑內因未見額陰所題故

薦福寺思恒律師碑

開元十四年十二月立常□□撰文正書在咸寧

律師姓顧氏世爲吳郡人曾祖明周左監門將軍祖元隨門下上儀同三司徐無祁開國公使持節洪州諸軍事洪州刺史父藝唐恒州錄事參軍師初授業于持世禪師後參素律師新疏素律師者長安興善寺僧新疏卽所講法華經三萬七千部是也說見西陽雜俎徐無字並從艸作蔡蕪隋書地理志漁陽郡統縣一曰無終縣爲後齊置後周廢徐無縣入焉隨時無徐無祁應是裴周舊號上儀同三司從四品師卒于開元十四年弟子智舟爲之刻石

開元寺尊勝經石幢

開元十六年楊淡立正書在隴州

文中有云諸佛刹土刹今又作刹唐釋元應衆經音義云刹字書無此字卽刹字略也刹音初又作擦音察据此知刹刹二形皆刻之省寫而徐鉉篆刹字以爲說文新附陋矣此幢字畫精整爲唐時第一

敬節法師塔銘

開元十七年七月立正書在咸寧杜永村

興聖寺主尼法澄塔銘

開元十七年十一月立嗣□王志□撰文并正書在咸寧馬頭空

文中有云托事蔣王求爲離俗遂于上元二年出家蔣王太

宗子暉也上元中爲箕州刺史書撰人名或云是嗣彭王志  
疎

比丘尼堅行禪師塔銘

開元二十一年閏三月立正書在西安府城南

代國長公主碑

開元二十二年十二月立鄭萬鈞撰文并行書在橋陵

公主名華字華婉睿宗弟四女萬鈞卽其駙馬都尉也

李潛題名

開元二十四年六月刻正書在華嶽廟

大智禪師碑

開元二十四年九月立嚴挺之撰文史惟則隸書在西安府

學

美原縣尉張斯墓志銘

開元二十四年十月立正書在長安劉氏

此與張希古碑並在劉氏乾隆辛丑歲余以二十千錢購得之今攜送於靈岩山館

無畏不空禪師塔銘

開元二十五年八月立正書無撰書人姓名在咸陽窰店鎮廣化寺

文稱不空于師子國從普賢阿闍梨求開十八會金剛灌頂法又稱一日調象俄而群象奔逸不空遽于衢路安坐象至皆頓止跪伏少頃而去二事並見嚴郢所撰大廣智不空三藏碑中故說者謂此無畏不空與大廣智不空卽是一人案大廣智不空以大歷中卒于興善寺此卒于廣化寺爲開元

二十三年時地並異不得合而爲一攷開天傳信錄云無畏  
三藏初自天竺至所司引謁元宗元宗謂曰師來欲何方休  
息無畏曰臣在天竺時聞西明寺宣律師持律第一願往依  
止元宗可之因居焉據此是另爲一人又案大廣智不空本  
無無畏之名其起塔卽在本院此則瘞于龍門之西山地屬  
咸陽爲非一人更無疑

比丘尼惠源和上志銘

開元二十五年十一月立楊休烈撰文姪定正書在西安府  
碑云師姓蕭氏大父諱瑀父鈇唐書稱瑀好浮屠法間請捨  
家爲沙門比丘尼法願其女也而惠源又繼之史之言爲不  
虛矣書本傳瑀有子鈇而不及鈇定瑀之曾孫終太子少師

蘇頲題名



開元二十六年八月刻正書在華嶽廟

龍光寺舍利塔記

開元二十八年七月立正書在扶風

祠部員外郎裴積墓志

開元辛巳歲二月立族叔融撰文并正書在西安府城南  
積唐書附見其祖行儉傳裴光庭之子也獨孤及行狀云積  
以開元二十九年官終尚書祠部員外郎子四人長曰儋次  
儋次儋季伯興碑文皆合傳只及儋者以儋子均封郇國公  
餘三人皆無可表見故也

夢真容勅

開元二十九年六月立蘇靈芝正書在盤屋會靈觀

此非唐原碑乃後人重刻者碑首有重模蘇靈芝書唐老君

應見碑十二字可證

持進莒國公唐儉碑

正書篆額在醴泉小陽村

案金石錄云開元二十九年儉曾孫追立儉史以爲字茂系  
今碑云茂約儉子史在儉傳以爲名善識在豫章公主傳以  
爲名茂識今碑云名尚識皆當以碑爲正

大智禪師碑陰記

開元二十九年立陽伯成撰文史惟則隸書在西安府學  
陽伯成文苑英華作楊伯成

褒封四子勅

天寶元年二月立正書在盤屋樓觀

四子卽莊子列子文子庚桑子也是時加莊爲南華真人列

爲冲虛真人文爲通元真人唐桑爲洞靈真人其所著書並號真經而不知庚桑卽爲僞書蓋明皇好讀道書而人卽造僞以邀功若此

告華嶽文

天寶元年四月立韓賞撰文韓擇木隸書在華嶽廟、擇木自署榮王府司馬者是時靖共太子改王榮故也賞名見御史臺精舍記及郎官題名石柱

老子靈應頌

天寶元年七月立戴旋撰序劉同昇撰頌戴伋隸書在盤屋此刻宗聖觀記之陰其隸體與史惟則大智禪師碑同或是惟則代爲之者耶

吏部尚書南曹石幢

天寶元年九月立左光允撰序尹匡祚撰頌正書在鄆縣州堂寺

後有奉爲太尉降生令月特建立吉祥尊勝經幢上嚴台算貞明二年七月十一日建討擊使張虔斌監立行

隆闢法師碑

天寶二年十二月立正書無撰書人姓名在西安府學

文有云弟子大溫寺主思莊敬想清徽勒茲元琰疑卽其人  
所撰書

薛良佐塔銘

天寶三載閏四月立再從兄鈞撰文弟良史正書在終南山

石臺孝經

天寶四載九月立明皇注并隸書太子臣亨篆額後有李齊

古上石臺告成表及批荅並行艸書有李林甫等題名正書在西安府學

明皇序文云韋昭王肅先儒之領袖虞翻劉邵抑又次焉劉炫明安國之本陸澄譏康成之注案陸德明孝經音義有孔安國鄭康成王肅韋昭劉邵而無虞翻劉炫陸澄陸譏康成而據之爲注是明皇不宗鄭學者矣唐書藝文志有今上孝經制旨一卷應卽是書李適之本傳載適之爲刑部尚書不及兵部封清和縣公不及渭源縣公唐豫封襄陽縣男而本傳以爲縣子皆新史之缺譌悉當以碑爲正者也碑永林甫等臣名共四十五人

逸人竇括士碑

天寶六載二月立李邕撰文段清雲正書范岌題額在三原

橋頭鎮

居士名天生有三子俱爲宦官長處賓次思賓次元禮元禮行內侍省內侍加銀青光祿大夫官最顯碑末有元涇陽縣尹姚遠禮重立題名

義興周夫人墓志

天寶六載十月立正書在長安農家文有云岳也匪才泰爲序述則撰志者名也迺其姓此碑近爲山西汾陽某氏攜去

陀羅尼經幢

天寶七載二月立正書在咸寧開元寺

後有駱齊沐重建跋

陀羅尼經幢殘本

天寶七載三月立蔣嗣撰文張寶行書在咸寧

尊勝陀羅尼經幢

天寶七載五月立張少悌行書在長安崇聖寺

千福寺多寶佛塔感應碑

天寶十一載四月立岑勛撰文顏真卿正書徐浩題額在西  
安府學

恒農先賢積慶之碑

天寶十二載八月立明皇撰文并隸書皇太子亨篆額在扶  
風

此卽贈武部尚書鄴國公楊珣碑也碑並隸書惟御製御書  
及皇太子題額等字正書珣字仲珣國忠父唐書宰相世系  
表以珣爲友子與此碑云烈士志業者異

□志廉墓志

天寶十三載六月立申堂構撰文韓獻之行書在長安農家此碑向在農家乾隆四十三年余以數千錢買之今移置靈巖山館庶免村童敲火牧牛觸角之害也

施燈功德幢

天寶十三載立正書在長安香積寺

張希古墓志

天寶十五載立用顏行書在長安劉氏

碑載府君字希古不言其名曾爲馬邑郡尚德府折衝都尉馬邑卽朔州唐書不及府名亦可以補史之缺

金仙長公主神道碑

號年缺徐嶠之撰文明皇行書在橋陵



唐書本傳云太極元年與玉真公主皆爲道士碑云丙午歲度爲道士丙午歲者神龍二年也兩說不合

### 尹尊師碑

無號年員半千撰文隸書不詳姓名此係元時重刻

### 華嶽廟碑殘石

號年缺權係文杜繹分書

石碑石分爲三存一百七十七字文不可讀惟係文繹書數處可辨致金石錄有禹傳卽係所撰文當開元二十五年又宰相世系表以爲卽德興之祖故附置于此書法類蔡有鄰王簿常冀尉元鵠殘碑

### 分書並在華嶽廟

碑只存六行共三十四字不可句讀惟簿尉二名可識又有

史子華刻字字樣史子華者卽刻大智禪師之碑者也故附  
置于此

艸書心經

無號年

刻後有跋指爲右軍非也王世貞以爲是鄧萬鈞書卽張說  
爲之序者說文見唐文粹

十字文斷名

無號年張旭艸書並在西安府學

顏魯公題名

乾元元年十月刻正書在華嶽廟周天和碑之側

碑題曰皇唐乾元元年歲次戊戌冬十月戊申眞卿自蒲州  
刺史蒙恩除饒州刺史十有二日辛亥次於華陰與監察御

史王延昌大理評事攝監察御史穆寧評事張澹華陰令烈  
曷主簿鄭鎮同謁金天王之神祠顏真卿題記以唐書本傳  
及留元剛年譜攷之公以肅宗二年十一月出爲馮翊太守  
三年三月改蒲州刺史十月又改饒州刺史也其貶饒州爲  
唐旻所誣因亮行狀曰天寶十五載元宗以公爲戶部侍郎  
依前平原太守充本郡防禦使公以景城長史李暉爲副前  
侍御史沈震爲判官又詔公爲河北採訪處置使公又以前  
成陽尉王延昌爲判官張澹爲友是年秋祿山遣將史思明  
尹子奇等併力攻河北諸郡前後百餘日饒陽河間景城樂  
安相次而陷所存者平原博平清河三郡而已人心潰亂不  
可復制公乃將麾下騎數百棄平原渡河取路朝肅宗于鳳  
翔初公之未渡河也謂判官穆寧張澹曰賊勢旣爾若委命

待擒必爲所快心今計經赴行在公以爲何如寧澹與諸將然之遂行朝廷除公爲憲部尚書令狐岷神道碑曰時前殿中侍御史沈震鹽山尉穆寧武邑丞李銑清河王簿張澹各抒器能叅贊成務此王延昌穆寧張澹等與偕之所自來然攷穆寧傳寧以明經調鹽山尉祿山反寧募兵斬僞景城守劉道元聞真卿拒祿山卽馳謁謂曰我可從公死旣而賊攻平原寧勸固守真卿不從夜亡過河見肅宗行在帝問狀真卿對不用寧言以至此帝異之名寧將以諫議大夫任之會真卿以直忤旨寧亦罷上元初擢殿中侍御史與行狀寧澹與諸將然之之說有不合則當以史爲正者矣年譜曰是年九月有祭姪季明文十月有華嶽廟題名至東京拜掃有祭伯文豪州刺史文

張惟一祈雨疏

乾元二年二月刻李權隸書

書史會要李權唐宗室李平均叔也工八分官金州刺史惟  
一名見宰相世系表

王右等謁岳祠記

上元元年十二月刻題名隸書號年篆書並李樞書

樞李權弟述書賦注云李權淮安王神通曾孫工八分弟樞  
工小篆內有處士王季友卽杜甫所稱鄴城客子是也豫章  
圖經云季友鄴城人家貧賣履博極群書李勉引爲賓客甚  
敬之

太州別爲題名殘字

無號年正書

案文只存十三字云正議大夫太僕少卿兼太州別駕攷華州以上元二年改名太州則此爲肅宗時人所題矣

邱據謁獄廟題名

寶應二年六月刻正書並在華獄廟

贈工部尚書臧懷恪神道碑

廣德元年冬十月立顏真卿撰文并正書李秀巖□□在三原九陂城

魯孝公子彊字子臧他書不見惟春秋左氏傳孔穎達正義言之是承杜預公子諸舊說耳今碑亦云又文苑英華載李邕左羽林大將軍臧公神道碑文云其先派于后稷演于周公伯魯孝公子臧因而氏焉說亦與此同懷恪少隸戎級起官拜勝州都督府長史轉左衛率府左郎將再轉右領軍中

郎將兼安北都護中受降城使朔方五城都知征馬使充都  
知兵馬使河西軍前將河源軍使兼隴右節度副大使開西  
兵馬使拜右武衛將軍封上蔡縣開國侯薨贈右領衛大將  
軍又贈魏州刺史三贈太常卿四贈工部尚書有七子長曰  
希崇游擊將軍崇仁府折衝次曰希和豐州別駕贈宋州刺  
史三曰希忱左武衛將軍朔方節度副使贈太子賓客四曰  
希愔右衛左郎將劍南討擊副使贈汝州刺史五曰希景右  
驍衛郎將靜邊軍使贈秘書監六曰希晏寧州刺史左金吾  
衛將軍贈揚州大都督七曰希讓開府儀同三司行太子詹  
事兼御史大夫邠寧山南觀察使集賢侍制工部尚書渭北  
節度使魯國公希讓官最顯父以子貴故得贈工部尚書也  
懷恪有二兄文中所稱兄左羽林軍大將軍平盧副持節懷

亮未知居何行也又稱兄子謙亦未知爲何人之子又元和  
姓纂以希讓爲懷亮子據碑可証其誤

李懷讓題名殘字

無號年正書

右只存三行每行七字共二十一字首行云軍兼同華兩州  
節次行云卿使持節華州諸三行云丞上柱國汧國公攷唐  
常袞華州刺史李公墓誌銘云公諱懷讓以佐命功特授鎮  
國大將軍加特進兼鴻臚卿封汧國公充潼關鎮國軍使同  
華等州節度使華州刺史以廣德元年九月薨于華州軍府  
詔陪葬建陵則此乃懷讓題名也再攷唐會要叙陪陵名位  
建陵只及汾陽王郭子儀一人而無懷讓應爲缺略懷讓薨  
于廣德改元故附置于此



韋胆題名

廣德二年二月刻正書

題云銀青光祿大夫太常卿使持節延州都督侍御使上柱國岐陽縣開國男韋胆以廣德二年二□□七日越自師旅將詣朝廷云云者以是時僕固懷恩叛也韋君不詳其名劉士深謁華嶽廟記

廣德二年三月刻正書

內有李迺李延李迺李遠四人名宰相世系表俱有在東祖李氏下

孫廣題名

廣德二年六月刻正書並在華嶽廟

太保祁國公廟碑并碑陰

廣德二年十一月立顏真卿撰文并正書隸額在西安布政司

公名敬之漢光祿大夫廣意之後廣意世系表作廣智碑載子儀官爵甚詳大略與史傳合史稱振遠軍使卽單于副都護九原太守卽兼豐州都督也又通鑑稱是年十二月拜尚書令此碑建於十一月卽稱尚書令者應是碑陰後書及之也傳稱武舉及弟授左衛長史應依碑作長上碑載子儀兄弟七人孫十五人曾孫二人孫除子儀子八人外雖是子琇子昕照驅幼則子昉曉幼賢子琬子瑛子曾孫銳是曜子銑是耿子

臨淮武穆王李光弼神道碑

廣德二年十一月立顏真卿撰文張少悌行書在富平縣學

與郭僕射書

顏真卿撰文并艸書在西安府學

碑不著號年金石錄附于大歷之末余攷宋留元剛年譜代宗廣德二年十一月有與郭僕射書則附大歷者誤也碑或以爲宋永興守吳中復所刻或以爲安師文刻未詳孰是

李仲昌等題名

廣德□年三月刻韋潯正書

宰相世系表云潯官昭應令案此云行華陰縣丞同正當在未爲昭應令之先又有云行尉崔廼表以爲廼終同州刺史

韋潯題名

無號年並在華嶽廟

秋官尚書河間公之碑

永泰元年二月立撰書人姓名並缺隸書篆額在高陵鹿臺鄉

贈太子賓客白道生神道碑

永泰元年三月立于益撰文華宗正書并篆額在咸寧鳳栖原

道生南陽郡王元光之父官終左衛大將軍追贈太子賓客夫人康氏爲趙國太夫人唐書元光傳以爲終寧朔州刺史者非也

焦綬題名

永泰七年春刻正書在華嶽廟

光祿卿王訓墓志

大歷二年八月立剛澤王德撰文并正書在咸寧涿川原

訓字訓琅邪臨沂人永穆大長公主之仲子定安長公主之孫永穆尚王繇繇同皎子也定安尚同皎訓後尚博平郡主官至光祿卿卒塋於滄川原其閭閻世系如是憑義珣之子見宗室世系表

### 三墳記

大歷二年立李季卿撰文李陽冰篆書

文有云下土得訛者用宋玉九辯文也訛玉篇以爲卽古文訛字以講陰堂講從聿聲與構字通史記漢書凡媾解字多作講亦是也聿字見魏張猛龍碑及周華嶽廟頌嵩少字應卽用崇見于漢書而竟作嵩劇甚字應用勑見于漢隸字原而竟作劇楷字應從允作煇而從犬作猓禮字應從豐作禮而從豐作禮徹字從青作徹𣎵字從陸作斷焯字作焯執字

作藝昇字作異皆其不合于六書之正者也又說文無第字只作弟而孔穎達正義引以爲從竹從弟說文無莅字只作隸故鄭康成注儀禮每讀位爲莅此竟有第字莅字蓋後人隸寫之譌而以之作篆則尤謬也

### 栖先塋記

大歷二年立李季卿撰文李陽冰篆書並在西安府學

陽冰書結體茂美而多乖于六書之義然蔡邕石經已多別

體豈書家多不究小學耶文中若窈從窆碑作𡇗高從口

𡇗碑下口從口之口𡇗碑作𡇗從舍碑省從合樓或作西

碑合作栖樊中從爻碑從夕佐古只作左碑加人岡碑謬作

𡇗勢古只作執見漢書碑加力宜從夕碑從因隧古只作隊

見竹書穆天子傳碑作隧輔碑作輻藏古只作藏詩中心藏

之先儒有藏臧二義碑作藏悅經傳多作說碑作悅版加作  
版皆詭于文字之正若泉作泉借泊字爲之改從已借致改  
字爲之寶作瑤案瑤字見竹書穆天子傳玉篇引聲類亦曰  
古文瑤字此或古人省文借字之法猶未大失也篆者聖人  
不虛作非可依隸以造昔徐鉉作說文新附識者多譏其謬  
獨怪陽冰自言斯翁之後直至小生又欲求刻石經立于大  
學而不究小學如此倘任鴻都之役未見其勝於張參唐元  
度諸人也

是碑宋大中祥符三年重刻

歸營州都督薊郡公李楷洛碑

大歷三年三月立楊炎撰文史惟則八分書在富平縣西北  
覓子店

楷洛太尉光弼之父漢李陵之後裔也累官左羽林大將軍  
封薊郡公加雲麾將軍唐書附見光弼傳

第五琦題名

大歷五年六月刻正書

文云前相國第五公自戶部侍郎出牧杭州蓋坐與魚朝恩  
善貶也又云子婿虞當子婿之稱自此始婿作聶者干祿字  
書云聶聶瑁上俗中通下正婿一變爲瑁再變爲瑁三變爲  
聶四變爲聶皆由胥變爲胥致誤又聶或亦寫作聶故月耳  
相潤

裴士淹題名

大歷五年六月刻正書

士淹之出亦坐朝恩黨見唐書朝恩傳



張兄弟題名

大歷五年六月刻正書並在華嶽廟

宰相世係表蘇氏河南尹震有七子敦發教徹政儼此云  
汝州司馬敦弟華陰縣令發弟咸陽縣主簿教弟前華原縣  
丞徹弟太常寺主簿敞弟吏部常選敞弟少府監主簿教弟  
儼不同者政疑卽是敞有敦不應後有政也政疑卽是敞字  
形相近此等要當以碑爲正

金吾衛將軍臧希晏神道碑

大歷五年十月立撰人缺韓秀弼隸書篆額在三原長坳鄉  
諸道石刻錄云張孚撰文

盧綸題名

大歷六年二月刻正書在華嶽廟

永仙觀王田尊師碑

大歷六年十月立蕭森撰文□名德集晉王羲之書

永仙觀王田尊師德行之碑

號年及撰人缺□光書并篆額並在富平美原鎮

相傳美原鎮爲真人拔宅上昇處故後人立碑于此碑甚磨  
泐號年莫可攷故附置于此

佛頂尊勝陀羅尼幢銘

大歷六年十月立僧普眞撰文康玠行書在富平六井

李昌謁嶽廟題名

大歷六年刻正書

鄭仲堅題名

大歷七年正月刻正書

侯季文題名

大歷七年三月刻正書

題內有開州刺史崔微男漑等名宰相世系表云微河南少尹漑太常少卿

韋憑題名

大歷七年十月刻正書

元澄題名

大歷八年十二月刻正書

題內有大理評事盧恒宰相世系表云恒殿中侍御史

謁華嶽廟碑

大歷九年季春立盧朝微撰文並正書

李謀題名

大歷九年十月刻正書並在華嶽廟

兵部尚書王忠嗣神道碑

大歷十年四月立元載撰文王縉行書趙憇篆額在渭南鄉賢祠

載忠嗣壻也史稱忠嗣與皇甫惟明輕重不得貶東陽府左果毅爲李林甫所惡貶漢陽太守碑皆不及之舊唐書叙載縉官爵較詳亦無載封潁川郡公縉太微宮使齊國公事是史碑兩失之可互証而兩得之者也崇元館本崇元學天寶二載置大學士一人以宰相爲之領兩京元元宮及天下道院攷嵩陽觀聖德感應頌石臺孝經李林甫陳希烈等題名並同新史百官志及縉本傳並稱爲崇賢館者誤

真化寺尼如願律師墓志

大歷十年七月立沙門飛錫撰文秦昊正書在咸陽畢原  
志作于大歷十年七月文有云貴妃獨孤氏弟子長樂公主  
獨孤氏者代宗妃也于是年十月薨追冊爲皇后長樂公主  
卽肅宗女宿國公主

慈州刺史王叔清碑

大歷十二年二月立侯冕撰文正書姓名缺在高陵奉正原  
高力士神道碑

大歷十二年五月立行書在蒲城

無憂王寺大聖真身寶塔碑銘

大歷十三年四月立張彧撰文楊播正書篆額在扶風法門  
寺

困學紀聞曰舊史德宗紀貞元六年岐州無憂王寺有佛指

骨寸餘先是取來禁中供養二月乙亥詔送還本寺此迎佛  
骨之事也韓愈傳云鳳翔法門寺有護國真身塔內有釋迦  
文佛指骨一節寺名與前不同閻若璩駁之曰法門寺與無  
憂王寺紀載非一手故其名互異說非也

上官沼題名

大歷十三年七月刻行書在華嶽廟

宰相世系表有上官詔當卽其人宜從碑作沼爲是

贈揚州大都督段行琛神道碑

大歷十四年閏五月立無撰文人姓名張增正書李同系篆  
額在汧陽

行琛忠烈公秀實父也金石錄又有一碑爲楊炎撰文蕭正  
正書在大歷四年却無此碑標題作楊攻開成尚書

石經淮海惟揚州字亦從木則是時兩字通用矣  
孔子廟殘碑

程浩撰文顏真卿正書在華州

此文浩以大歷二年作於扶風魯公曾書此于湖州華州有  
之非也疑後人僞作